

R E G N V M A B I S S I N O R V M

das sanguine recenti tanquam jure aliquo tinctas, nobiles in deliciis habent. In toto regno æris monetalis usus non est, sed ejus loco aurum purum infectumque penditur. Etiam sal (uti per totam fere Africam) rerum commutationibus inservit. Idem alicubi ferrum globuli forma expolitum facit. Sed piper in tanto apud hos est precio, ut quodcumque quis mercari sibi velit, pro eo redimere facile sit.

Habent hæ regiones omnis fere generis animalia, aves, elephantes, leones, tigrides, lynces, simias, cervos (hoc contra veterem opinionem it, qui negant Africam habere cervos). Sed toto sexennio, quo istis in locis hæsit Alvaresius, nec ursum nec cuniculum se vidisse scribit.

Sunt autem his locis, uti & in Ægypto, peculiare malum locustæ, quarum tantus subinde excrevit numerus, ut aerem obfuscare videantur, tam densis agminibus nunc hanc, nunc illam provinciam hostiliter vastantes, ut omnem segetem messemque devorent, arborum folia corticesque depalcantur, camposque adeo depopulentur, ut incolæ sæpe domicilia avita relinquere, & ad alias sedes commigrare cibi penuria cogantur.

Dividitur in compluria regna, sive provincias; quarum nomina sunt: *Dasila, Barnagasso, Dangali, Dobas, Trigemabon, Ambiancantipa, Vangue, Bagamidri, Beleguanze, Angore, Balli, Fatigar, Olabi, Baru, Gemen, Fungi, Tirut, Esabela, Malemba*. Urbes in universo Imperio paucae sunt. Vicis plurimum habitatur, domibus ex creta & stramine constructis. Rex ipse, (qui albo colore esse fertur) sub tentoriis degit, quorum sex millia eum sequuntur. *Amara* arx est munitissima, in monte *Amara* condita, in qua Regis filii sub validissimo praesidio educantur, donec patre defuncto hæres producat. Regno *Trigemabon* subest regnum *Tigrai*, in quo est urbs *Caxumo*, sive *Cassu-*

mo, sedes olim, uti in eorum annalibus est, reginae *Sabæ*, ac post etiam *Candaces* reginae.

Fluvii in hoc regno duo memorabiles per Æthiopiam labentes sunt: *Abanhi*, qui *Astapus* *Ptolemæo*, & *Tacassi*, qui etiam *Astaboras*, in quem complures alii amnes conflunt. Fons *Abanhi* est *Barcena* lacus sub æquinoctiali jacens, in quo plures insulae. *Ptolemæo* vocatur *Coloe* palus.

Regio ipsa in universum (ut ex recentioribus, qui eam lustrarunt, constat) fertilissima. Æstatem quotannis habet geminam, & ferme perpetuam. ita, ut uno tempore in aliis agris sementis fiat, in aliis colligatur messis. Alicubi singulis mensibus novas fruges, legumina praefertim feruntur. Triticum quidem parce producit, hordeum vero, milium, sesamum, ciceres, fabas, aliaque legumina, copiosissime profert. *Hebeno Persico* & siliquaastro abundat. Saccharum etiam in arundinibus sufficit copiose, sed ipsum coquere & expurgare nesciunt. Vites multae sunt, vini tamen usus nullus, praeterquam in aula regis & magni Patriarchae. Mala medica, citrea, mel, linum habent. artem tamen ex lino telas conficiendi ignorant. Pannos ex gossipio sibi parant, cujus hic magnus est provenus. Etiam metalla habent auri, argenti, aris, sed ea expurgare nesciunt.

Inscriptio, qua Rex uti solet, hæc est: *NN. Tituli regis. Supremus meorum regnorum, à Deo unice dilectus, columna fidei, ortus ex stirpe Iuda, filius David, filius Salomonis, filius columnæ Stonis, filius ex semine Iacob, filius manus Mariæ, filius Nahu secundum carnem, filius sanctorum Petri & Pauli secundum gratiam, Imperator superioris & minoris Æthiopiæ, & amplissimorum regnorum, jurisdictionum, & terrarum, rex Noë, Caffares, Fatiger, Angola, Baru, Balignara, Adeæ, Vanguæ, Goyama, ubi Nili fontes, &c.*

